

# **Akinafarir Faragha Zuim, Pol Timoti Baghava an Osiri**

## **O**

### **1 Timoti**

### **Akar faragha zuim**

Timoti, Kraisin adarazir gumazir igiar mam, a Listran nguibar ekia Galesian Provinisin itimin ize. An amebam, a Judan amizim, ezi an afeziam a Grighin gumazim. Pol Timoti inizima, an a koma aruava Godin ingangarim gami. (Ni Aposel 16:1-3in gan.) Ezi Timoti gin Efesusin nguibar ekiamin itir siosin gumazir dapanimin oto. Ezi Pol akinafarir kam a bagha an osiri.

Akinafarim faragha migeir bizim, a kamakin, Timoti deravira ua bagh ganigh, gumazitaba gumazamizibar nighnizir gavgavibagh asighasighan maraghe. Gumazir kaba, me nighnizir igharaziba ikia ghaze, nguazir kam in itir biziba, da derazir puvati. Kamaghin amizi, gumazim guizbangin ikirimirir aghuim inisiva, dagher taba ateghiva egh amuimin ikian marki.

Bizir igharazir ekia akinafarim migeir mam, Timoti siosin ingangarim deraviram an ganam. Egha a uaghan migia ghaze, siosin gumazamizir dapaniba ko siosin ingangarir gumazamiziba, me arazir aghuibar amu.

Akinafarimin akar abuananaba, Pol Timoti migia ghaze, a Krai Iesusin ingangarir gumazir

aghuimra iki, egh arazir aghuibar vaghvagh siosin gumazamizibar amu.

## **Timoti uabi uan araziba deraghvira dar gan, egh siosin gumazamiziba uaghan men gan**

*(Sapta 1--6)*

<sup>1</sup> Ki Pol, ki Krais Iesusin aposel. God, en Akur-vazir Gumazim, ko Krais Iesus, gumazir e ganasa mizuaim, aning na misevezima ki aposelin oto.

<sup>2</sup> Timoti, ni na ko nighnizir gavgavim ikiava, mati guizbangira nan otarim. Ezi ki akinafarir kam ni bagha an osiri. God en Afeziam ko Krais Iesus en Ekiam, aningin apangkuvim ko kuarkuvim, ni damuti ni navir amirizimin iki.

*E ifavarir akaba bar a da baraghan kogham*

<sup>3</sup> Ki fomira Masedonian Provinsin ghughava, dughiar kamın ki akar gavgavir mam ni ganingi, egha datirighin ki akar kamra ua kamaghin ni mikimasa. Ki ghaze, ni Efesusin Nguibar Ekiamin ikiva gumazir maba migirigiar gavgavim me daning suam, me gumazamiziba Godin akamin men sure damuva, akar ifavarir taba me damuvira ikian marki. <sup>4</sup> Egh me pura eghaghanir araziba ko men ovavibar ziar migirigiar me zurara migiavira itiba, da atakigh. Akar kaba men nighnizibagh amima me onganighava tintinibar uariv gia uari adosi. Akar kaba me damuti, me

---

**1:1:** Kl 1:27    **1:1:** Kolosi 1:27    **1:2:** Ap 16:1, Ta 1:4    **1:2:** Aposel 16:1; Taitus 1:4    **1:3:** Ga 1:6, Fl 2:24    **1:3:** Galesia 1:6; Filipai 2:24    **1:4:** 1 Ti 4:7, 2 Ti 2:14-16, Ta 1:14    **1:4:** 1 Timoti 4:7; 2 Timoti 2:14-16; Taitus 1:14

nighnizir gavgavim Godin ikian kogham, egh God e damuamin bizim me deragh a gifoghan kogham. <sup>5</sup> Nan akar gavgavir kamın mingarimra kara, e bar uarigh ifuegham. E fo, e guizin nighnizir gavgavim Iesusin ikia, navir zuruzim ikia, egha uan araziba deravira da tuisigha arazir aghuibar gin zui. Eghti bizir kaba e damuti, e bar uarigh ifuegham. <sup>6</sup> Marazi arazir kam ataki, egha datirighin me onganigha pura akar mingariba puvatizibav gei. <sup>7</sup> Egha me igharaz darazi Godin Arazibar men sure damuasa. Egha me ghaze, men migirigiaba bar guizbangira. Ezi akar me gun migeim, an mingarim me uari a gifozir puvati, egha me uari uan akam deragha a gifozir puvati.

<sup>8</sup> E kamaghin fo, Moses Osirizir Arazir God a Ganingiziba, da bar dera. Eghti gumazitam bar deragh Godin Arazir kabar gin mangiti, Arazir Kaba an deragham. <sup>9</sup> Ezi e uaghan kamaghin fo, God uan Araziba isa gumazamizir aghuiba bagha da aningizir pu. Puvati, a gumazamizir arazir kurabagh amiba bagha, da me ganingi. Gumazamizir akaba batoziba, ko akaba barazir puvatiziba, ko gumazir akirim ragha God gasaraziba, merara God me bagha uan Araziba aningi. Kar gumazamizir Godin ziam fer puvatiziba, ko gumazamizir Godin aghuaziba, ko gumazamizir uan amebaba ko afeziaba misoghezi me aremeziba, ko gumazamizir igharaz darazi misozima me

---

**1:5:** Ro 13:8-10, Ga 5:14, 2 Ti 2:22    **1:5:** Rom 13:8-10; Galesia 5:14; 2 Timoti 2:22    **1:7:** 1 Ti 6:4, 6:20, Ta 1:10    **1:7:** 1 Timoti 6:4; 6:20; Taitus 1:10    **1:8:** Ro 7:12, 7:16, 7:22    **1:8:** Rom 7:12; 7:16; 7:22    **1:9:** Ga 3:19, 5:23    **1:9:** Galesia 3:19; 5:23

ariaghireziba, <sup>10</sup> ko arazir mizirizibagh amiba, ko gumazir uarira uari isava akuiba, ko gumazir gumazamiziba okiava me gamima me pura ingangarir gumazamizibar otiviba, ko gumazamizir ifariba, ko gumazamizir kotin aven ifariba, merara God me bagha uan Araziba aningi. Egha uaghan gumazamizir Godin guizin akamin apaniba, God me bagha uan Araziba aningi. <sup>11</sup> Ezi guizin akar kam, God an gun mikimasa na ganingizir akam, an Akar Aghuir kamın mirara ghu. Ezi Akar Aghuir kam e miġia ghaze, God angangarir ekiamın aven ikia, egha gavgavir ekiam iti. A bar derazima gumazamiziba an ziam fe.

*God Polin apangkuvizima, Pol a minabi*

<sup>12</sup> En Ekiam Krai Iesus, ingangarim bagha gavgavim na ganigha ghaze, ki an ingangarim damuam. Egha ingangarir kam damuasa na amisefe. Ezi ki kamaghsua a minaba. <sup>13</sup> Guizbangira, fomira ki dibovir akabar an ziam gasighasiki, egha an apanim gamuava, akar kurabar a mikeme. Ezi a fo, ki deragha a gifozir puvatigha, nighnizir gavgavim an itir puvati, egha arazir kabagh ami. Kamaghin amizima, a nan apangkufi. <sup>14</sup> Ezi Krai Iesus en Ekiamin

---

**1:10:** Stt 19:4-5, 1 Ti 6:3, 2 Ti 4:3, Ta 1:9      **1:10:** Jenesis 19:4-5; 1 Timoti 6:3; 2 Timoti 4:3; Taitus 1:9      **1:11:** Ga 2:7, Kl 1:25, 1 Te 2:4, 1 Ti 6:15      **1:11:** Galesia 2:7; Kolosi 1:25; 1 Tesalonika 2:4; 1 Timoti 6:15      **1:12:** Ap 9:15, Ga 1:15-16      **1:12:** Aposel 9:15; Galesia 1:15-16      **1:13:** Ap 3:17, 8:3, 9:4-5, 1 Ko 15:9-10, Ga 1:13      **1:13:** Aposel 3:17; 8:3; 9:4-5; 1 Korin 15:9-10; Galesia 1:13      **1:14:** Lu 7:47, Ro 5:20, 1 Ko 15:10, 2 Ti 1:13      **1:14:** Luk 7:47; Rom 5:20; 1 Korin 15:10; 2 Timoti 1:13

apangkuvim bar na gizivagha, na gamima, ki nighnizir gavgavim an ikiava gumamazir nighnizir gavgavim Krai Iesusin itiba, bar me gifonge.

<sup>15</sup> Krai Iesus, gumamazir arazir kurabagh amiba men akuraghasa nguazir kamın ize. Ezi men tongın, nan arazir kuraba bar men arazir kurabagh afıra. Ezi akar kam a guizbangıra, gumamaziba a baregh nighnizir gavgavim an iki. <sup>16</sup> Ezi Krai Iesus kamaghsua ifonge, gumamaziba bar kamaghın fogh, a gumamazir arazir kurabagh amibar asughasugha nımıra me gamua zui. Kamagh amizi a faragha nan apangkufi, ezi ki an ababanımın mın iti, eghti a na gamizir biziba men akaghti me dar ganıva, nighnizir gavgavim an ikiıva, ikirimirir ikia mamaghıra itim iniam. <sup>17</sup> Ezi an Atrivir Zurara Itim. An oveghan kogham, ezi e gumamaziba an ganighan kogham. A uabıra bar guizbangın God. Kamaghın amizi, e zurazurara ziar ekiam a daning mamaghıra iki mikim suam, God ni bar ekevegħa bar dera. Bar guizbangıra.

*Pol Timoti miġia ghaze, ni nighnizir gavgavir Iesusin itim, an suiragh gavgafigh*

<sup>18-19</sup> Nan otarim Timoti, ki fo, Godın akam inigha izir gumazim fomıra nın arazıbar gun mikeme. Ezi ki akar kam ġinighnigha, bizir ni damuamiba

---

**1:15:** Lu 15:2, 19:10, Ro 5:8, 1 Ti 3:1, 4:9, 2 Ti 2:11, 1 Jo 3:5      **1:15:** Luk 15:2; 19:10; Rom 5:8; 1 Timoti 3:1; 4:9; 2 Timoti 2:11; 1 Jon 3:5

**1:17:** Dan 7:14, Jo 1:18, Ro 16:27, Hi 11:27, 1 Jo 4:12      **1:17:** Daniel 7:14; Jon 1:18; Rom 16:27; Hibru 11:27; 1 Jon 4:12      **1:18-19:** 1 Timoti 3:9; 6:9; 6:12; Jut 1:3

bar dar gun ni migei. Ki kamaghin ifonge, ni nighnizir gavgavim Iesusin ikiva an suiragh gavgavigh, uan araziba deravira da tuisigh arazir aghuibar gin mangi. Ki kamaghsua, ni Godin akam inigha izir gumazim ni ganingizir akar kabar gin mangi, egh tuavir kamın ni midorozir aghuim misoghiva nighnizir gavgavimın aven tugh gavgafigh. Bizir kam bagha, ki akar kam ni ganidi. Ezi gumazir maba, me uan araziba deragha da tuisigha, arazir aghuibar gin mangan aghuagha da batosi. Egha tuavir kamın me uan nighnizir gavgavibagh asighasiki. <sup>20</sup> Ezi men tongin Himeneus ko Aleksander kamaghin ami. Ezi ki kamaghin ifonge, aning ua Godin ziam gasighasighan markiam. Aning kamaghin foghasa, ki aning isa Satanin agharim gati.

## 2

### *E gumazamizibar akurvaghsi God ko mikimiva an azangsigham*

<sup>1</sup> Ki mighighavira ia migei, faragh damuamin bizim a kamakin, ia gumazamiziba bagh God ko mikimiva a minabiva an azangsighiva, egh a gumazamiziba bar men akurvaghsi a gakaghon. <sup>2</sup> Egh uaghan atriviba ko gavmanba bagh Godin azangsigh. Kamaghin, e bar deragh ikiva navir amirizibar ikiva, God baghavira itir arazibar amuva, God ifongezir araziba bar dar gin mangam. <sup>3</sup> God ko migeir arazir kam, a Godin

---

**1:20:** 1 Ko 5:5, 2 Ti 3:17-18, 4:14-15    **1:20:** 1 Korin 5:5; 2 Timoti 2:17-18; 4:14-15    **2:1:** Jeremaia 29:7; Esekiel 6:10; Rom 13:1; Efesus 6:18; Filipai 4:6

damazimın bar dera. God, en Akurvazir Gumazim, an arazir kam gifonge. <sup>4</sup> A kamaghsua, a bar gumazamiziba men akurvaghām. Eghti me bar guizın akamın mingarim gifogham. <sup>5</sup> E fo, Godın vamıra iti. Ezi abuir gumazir vamıra iti, a God ko en tighın iti. A gumazir kamra, Kraıs İesus. <sup>6</sup> Dughiar God inabazimın, Kraıs İesus gumazamiziba bar me bagha uabi isa God ganigha aremegha ua me givese. Ezi arazir kamın God kamaghın en aka, a uan gumazamiziba bar moghıra ua me iniam. <sup>7</sup> Egha ingangarir kam bagha, God aposel ko akam akunamin gumazimın ikiasa na mısefe. Ki guizbangıra mıgei, ki ifarir puvati. A Kantrin Igharazibar Gumazamizibar sure damuasa ingangarim na ganıngi, eghti me nıghnızir gavgavım Kraısın ikıva guizın akam gifogham.

<sup>8</sup> Ki kamaghın ifonge, nguazir kamın gumaziba bar dafariba fıva God ko mıkim. Ki kamaghsua, me bar uari ısıva God danıngıva, zuegh ikıva, anıngagharir arazim ko adoghodozir arazim atakigh. Me arazir kam damuva, God ko mıkim.

*İngangarir aghuım damuamin arazim, a guizın*

---

**2:4:** Eše 18:23, Jo 3:16-17, 17:3, 1 Ti 4:10, 2 Ti 2:25, 2 Pi 3:9      **2:4:** Eşekiel 18:23; Jon 3:16-17; 17:3; 1 Timoti 4:10; 2 Timoti 2:25; 2 Pita 3:9      **2:5:** Ro 3:29-30, Ga 3:20, Hi 8:6, 9:15, 12:24      **2:5:** Rom 3:29-30; Galesia 3:20; Hıbru 8:6; 9:15; 12:24      **2:6:** Mt 20:28, 1 Ko 1:6, Ga 1:4, Ef 1:7-9, 2 Te 1:10, Ta 1:3      **2:6:** Matyu 20:28; 1 Korin 1:6; Galesia 1:4; Efesus 1:7-9; 2 Tesalonika 1:10; Taitus 1:3      **2:7:** Ap 9:15, Ga 1:16, 2:7-8, Ef 3:7-8, 2 Ti 1:11      **2:7:** Aposel 9:15; Galesia 1:16; 2:7-8; Efesus 3:7-8; 2 Timoti 1:11      **2:8:** Aıs 1:15, Mal 1:11, Jo 4:21      **2:8:** Aısaia 1:15; Malakai 1:11; Jon 4:21

*amizibar kurukazim*

<sup>9</sup> Ki uaghan kamaghın ifonge, amiziba korotiar aghuibar aghuti, da men tughatıgham. Eghti men korotiaba, ıgharaz darazi men ganıva nıghnızir kuraba ko aghumsızir nıghnıziba ikian kogham. Me uan dapanir arıziba mıghvıra da asingan marki, egh uan mıkarziba, manmaniaba ko gol ko korotiar bar pın koziba, puram azenan dar kurukan marki. <sup>10</sup> Amizir Godın akamın gın mangasa ifongeziba, me arazir aghuibar amu. Arazir kaba, kar guızın men kurukazim.

<sup>11</sup> Egh amizir mam bar uabi dikabıragh nımıra ikıva Godın akamın fofozim iniam. <sup>12</sup> Ki kamaghın amizir kamın amamangatızir puvati, a uabi fıva gumazımın faraghfaragh mangı, egh an sure damuan kogham. Amizir kam nımıra iki. <sup>13</sup> Ia oragh! God faragha Adamın ingarigha, gın İvin ingari. <sup>14</sup> Ezi Adam akar ifavariba nıghnızir gavgavım a dar itir puvati. Amizimra akar ifavariba nıghnızir gavgavım a dar iti, egha arazir kuram gami. <sup>15</sup> Amizim boriba batir ingan-garım damuva, egh nıghnızir gavgavım zurara Kraısın ikıva uabi ısıva a danıngıva zuegh iki, egh a ıgharaz darazıgh ifongegh, arazir aghuibar gın mangıti, God an akuragham.\*

**3**


---

**2:9:** 1 Pi 3:3-5    **2:9:** 1 Pita 3:3-5    **2:10:** 1 Ti 5:10    **2:10:** 1 Timoti 5:10    **2:12:** 1 Ko 14:34    **2:12:** 1 Korin 14:34    **2:13:** Stt 2:7, 2:21-22, 1 Ko 11:8-9    **2:13:** Jenesıs 2:7; 2:21-22; 1 Korin 11:8-9  
**2:14:** Stt 3:1-6, 2 Ko 11:3    **2:14:** Jenesıs 3:1-6; 2 Korin 11:3

\* **2:15:** Grıghın akam, vezın kamın deragha bıgha mıkemezir puvati.

*Siosin gumamazizir dapaniba arazir aghuibar amu*

<sup>1</sup> Akar kam a bar guizbangira, tina siosin dapanir mamın ikisi a ingangarir aghuim gifonge. <sup>2</sup> Siosin dapanim, an arazir aghuibar gın mangi, eghti me arazir kuratam bagh an ganıva avegham. An amuir vamıra iki, egh poroghamir arazim abıghan marki. Egh an dabirabim bar moghıra deragh, navir ghurimın araziba dikabiragh, egh arazir aghuibara damu ziar aghuim inıva, gumamazizir igharaziba ini dipenimın mangıva, deravıra gumamazizibar sure damu. <sup>3</sup> A wainın dipar aviribar amıva onganan marki. A zuamıra anıngaghıva gumazıbav soghan kogham, a men asughasugh. Egh bizıba bagh gumamazizıba adoghan marki, egh a dagıaba baghvıra ikian marki. <sup>4</sup> Egh deravıra uan dipenimın itir darazi men ganıva, borıbav kımıta me deravıra an akaba baragh dar gın mangi. <sup>5</sup> Siosin gumamazizir dapanıba, me uan dipenıbar itir darası deraghvıra men ganan kogh, manmaghın me Godın siosin ganamin ingangarim iniam? Bar puvati. <sup>6</sup> Gumamazizir datırıghıra nıghnızir gavgavim İesusın itıba, me Godın siosin ganan kogham. Me kamaghın nıghnıgh suam, e gumamazizir aghuıba, egh uan zıaba fam. Eghti God ivezir kuram Satan ganıngızı moghın ivezir kuram me danıgam. <sup>7</sup> Siosin gumamazizir

---

**3:1:** Ap 20:28, Ef 4:12, Fl 1:1, 1 Ti 1:15    **3:1:** Aposel 20:28; Efesus 4:12; Filipai 1:1; 1 Timoti 1:15    **3:2:** 1 Ti 5:9, 2 Ti 2:24    **3:2:** 1 Timoti 5:9; 2 Timoti 2:24    **3:2:** Taitus 1:6-9    **3:7:** Ap 22:12, 1 Ko 5:12, 2 Ko 8:21, 1 Te 4:12, 1 Ti 6:9    **3:7:** 1 Korin 5:12; 2 Korin 8:21; 1 Tesalonika 4:12; 1 Timoti 6:9

dapaniba, siosin azenan itir gumamaziziba me mikim suam, me ziar aghuim iti. Me ziar aghuim ikian koghtima, gumamaziziba akar kurabar me mikimti, me aghumsighiva, Satanin azuazimin aven mangigham.

*Siosin ingangarir gumamaziziba arazir aghuibar gin mangi*

<sup>8</sup> Kamaghira siosin ingangarir gumaziba, gumazibar damazibar me ziar aghuim iki. Egh me mizer pumuningin ikian marki, egh wainin dipar aviribar amiva onanan marki. Egh dagiaba bagh bar ikuvigh ifar da inian marki. <sup>9</sup> Me uan araziba deraghvira da tuisigh arazir aghuibar gin mangi, egh guizin akar e nighnizir gavgavim an itimin suiragh gavgafigh. <sup>10</sup> Ia faragh me isi ingangaritam datigh ganigh. Eghti men ingangarim deraghti, me siosin ingangarir gumazibar ikiam.

<sup>11</sup> Kamaghira, siosin ingangarir amiziba uaghan, gumamazizibar damazibar me ziar aghuim iki. Egh me igharaz darazi girakirangin me mikiman marki. Egh men dabirabim bar moghira deragh, egh me guizin deraghvira ingangarir me inizibar amu.

<sup>12</sup> Egh siosin ingangarir gumamaziziba, me poroghamir arazim abighan marki. Egh me uan boriba ko men dipenibar itir darazi deragh men gan. <sup>13</sup> Gumamazizir deravira ingariba, me ziar aghuiba iniam. Egh me atiatingan kogh uan nighnizir gavgavir Kraisis Iesusin itimin gun mikimam.

*Godin Arazibar akar mogomem, a bizir bar ekiam*

<sup>14</sup> Ki gorumra izi ian ganasa ifonge, egha migirigiar kam ia bagha an osiri. <sup>15</sup> Kamaghin amizi, ki zuamira izeghan koghti, ia migirigiar kabar ganiva ia arazir aghuibagh fogham, arazir e Godin adarazi damuamiba. E Godin adarasi, e Godin zurara itimin sios. Egha siosin aven itir darasi, erara, e dipenir akinibar min gavgavigh guizin akam gupughiva tugh gavgavigham. <sup>16</sup> E guizbangira fo, Godin Arazibar akar mogomem, a bar bizir ekiam. Ezi akar God en akazir kam, a kamakin:

A guizin gumazimin oto,

ezi gumazamiziba an gani.

Ezi Godin Duam kamaghin en aka,

an araziba bar dera,

Ezi enselba an gani.

Ezi gumaziba ghua

an akamin gun bar gumazibav kiri.

Ezi nguazimin itir gumazamiziba

nighnizir gavgavim an iti.

Ezi God a inigha uan Nguibamin ghuavanabozi

a ziar ekiam ini.

## 4

*Akar ifavariba Godin gumazamizibar nighnizibagh asighasisi*

---

**3:15:** Ef 2:19-22, 2 Ti 2:20      **3:16:** Mk 16:19, Jo 1:14, 16:8-9, 1 Pi 1:12, 3:18      **3:16:** Mak 16:19; Jon 1:14; 16:8-9; 1 Pita 1:12; 3:18

<sup>1</sup> Godin Duam guizbangira kamaghin miġei, Dughiar Ġin Izamim, gumamazitaba uan niġhnizir gavgaviba ategham. Egh me ifavarir duaba ko duar kurabar akaba baragh dar ġin mangam. <sup>2</sup> Eghti ifavarir gumaziba, me akar ifavaribar gumamazibar sure damuam. Men arazir aghuibar ġin mangamin niġhniziba ariaghire mati avim dar isizi, me ua uan arazir aghuiba ko kurabagh fozir puvati. <sup>3</sup> Me gumaziba amuiba ikian men anogoroke. Egha dagher God e bagha ingarizir maba, me ghaze ia dar aman marki. Dagher kaba, God ghaze, gumamazizir guizin akam gifogha niġhnizir gavgavim an itiba, merara dagher kaba iniam. Me dagheba iniva dar amiva God minabagh. <sup>4</sup> E fo, God ingarizir biziba bar, da bar dera. Ezi e bizir kurabar min a dar ganan kogham. Puvati. E God minabagh da iniam. <sup>5</sup> E fo, e daghebar amisi, e God ko miġeir arazim ko Godin akamin gun miġeir arazim damuti, God arazir kamın daghebar amuti, da Godin bizibar miraram otogham.

*Timoti Kraisin ingangarir gumazir aghuimin iki*

<sup>6</sup> Egh ni akar gavgavir kam Godin gumamazibar aningiva, ni Krais Iesusin ingangarir gumazir aghuimin ikiam. Egh ni, guizin akar e inigha

---

**4:1:** 2 Ti 3:1, 1 Pi 1:20, 2 Pi 2:1, 3:3, 1 Jo 2:18, Ju 18, MAA 9:20, 16:14    **4:1:** 2 Timoti 3:1; 1 Pita 1:20; 2 Pita 2:1; 3:3; 1 Jon 2:18; Jut 1:18; Akar Mogomem 9:20; 16:14    **4:3:** Stt 9:3, Ro 14:6, 1 Ko 8:8, 10:30-31, Kl 2:20-21, Hi 13:4    **4:3:** Jenesis 9:3; Rom 14:6; 1 Korin 8:8; 10:30-31; Kolosi 2:20-21; Hibru 13:4    **4:4:** Stt 1:31, Ap 10:15, Ro 14:14, 14:20, 1 Ko 10:25, Ta 1:15    **4:4:** Jenesis 1:31; Aposel 10:15; Rom 14:14; 14:20; 1 Korin 10:25; Taitus 1:15

nighnizir gavgavim an itim, ko fofozir aghuir ni gin zuiba, da ni damuti, tuavir kamın ni gavgavir ekiam iniam. <sup>7</sup> Egh ni eghaghanir kiniba ko eghaghanir kuraba akirim ragh dagh asaragh. Egh ni deravira Godın Arazibar sure damuam. <sup>8</sup> Ni fo, e uan mikarzibar amuti da gavgavighsi, e ingariva bizir maba sara damuti en mikarziba gavgavigham. Eghti e Godın Arazibar sure damuti da en ikiti e gavgavigham, da bar en akurvaghvira ikiam. Egh da e datirighın itir ikirimirim ko ikirimirir gin iniamimın en akurvagham.

<sup>9</sup> Ezi akar kam a bar guizbangira. Gumazamiziba bar a baraghiva nighnizir gavgavim an ikiam.\* <sup>10</sup> Godın ikia mamaghira itim, a gumazamiziba bar men Akurvazir Gumazim, an nighnizir ekiam kamakın, gumazamizir nighnizir gavgavim an itiba a men akuragham. E nighnizir gavgavim an ikia, bizir e fogha iniamiba bagha mizua iti. Kamaghın amizima, e zurara bar puvira ingari.

<sup>11</sup> Ni gumazamiziba akar gavgavir kam me mikimiva men sure damuti me dar gin mangi.

<sup>12</sup> Marazi nin gara ghaze, ni gumazir igiam. Egh gumazitam kamaghın ni mikiman markiam, kar gumazir kinim. Eghti ni nighnizir gavgavim

---

**4:7:** 1 Ti 1:4, 6:20, 2 Ti 2:16, 2:23, Hi 5:14      **4:7:** 1 Timoti 1:4; 6:20; 2 Timoti 2:16; 2:23; Hıbru 5:14      **4:8:** Sng 37:4, Mt 6:33, Ro 8:28, Kl 2:23, 1 Ti 6:6      **4:8:** Onger Akaba 37:4; Matyu 6:33; Rom 8:28; Kolosi 2:23; 1 Timoti 6:6      **4:9:** 1 Ti 1:15      **4:9:** 1 Timoti 1:15

\* **4:9:** E fozir puvati, a manmaghın mikimasa, “akar kam a guizbangira,” ves 8in itir akam, o ves 10in itir akam?      **4:10:** Sng 36:6, 1 Ko 4:11-12, 1 Ti 2:3-4      **4:10:** Onger Akaba 36:6; 1 Korin 4:11-12; 1 Timoti 2:3-4      **4:12:** 1 Ko 16:11, Ta 2:7, 2:15, 1 Pi 5:3

**4:12:** 1 Korin 16:11; Taitus 2:7; 2:15; 1 Pita 5:3

itiba bagh ababanimîn uabi atigh. Egh arazir aghuibar amuti, me nîn arazibar ganîva, nîn gin mangam. Nîn arazir aghuibara kara: nîn akar aghuiba, ko nîn daroriba, ko nîn arazir igharaz darazigh ifongezim, ko nighnîzir gavgavimîn arazim, ko Godin damazimîn zuegha itir arazim. <sup>13</sup> Datirighin tugh mangi ki izamin dughiam, ni Godin Akinafarimîn akabar gan me mikim, egh Godin akabar me mikin, egh dar mingarimîn men sure damu, egh uan gavgavim isi ingangarir kabar aning. <sup>14</sup> Ni fo, fomira siosin gumazamizir dapaniba uan dafariba isa nîn dapanim gariki. Ezi dughiar kamîn, Godin akam inigha izir gumazir mam akamîn gun ni mikeme, ezi tuavir kamîn God bizir aghuimîn min uan gavgavim isa ingangarim bagha ni ganingi. Ezi ki ni migei, ni gavgavir kam ataghiraghan marki, ni a sara Godin ingangarim damuvîra iki.

<sup>15</sup> Ni uan ingangarir kaba ni deravîra dar gan. Egh ni bar uabi isi ingangarir kam daningîva a damuti a deragh otogh. Eghti gumazamiziba bar nîn ingangarir arazibar gan fogham, da bar dera. <sup>16</sup> Egh ni bar deragh uan arazibar ganîva, uaghan ni gumazamizibar sure gamir ingangarimîn gan. Ni kamaghin damu gavgavightîma, tuavir kamîn God nîn akuragh, egh gumazamizir nîn akam baraziba uaghan men akuragham.

---

**4:14:** Ap 6:6, 8:17, 13:3, 19:6, 1 Ti 1:18, 2 Ti 1:6      **4:14:** Aposel 6:6; 8:17; 13:3; 19:6; 1 Timoti 1:18; 2 Timoti 1:6      **4:15:** 1 Ti 5:22  
**4:15:** 1 Timoti 5:22      **4:16:** Ap 20:28, Ro 11:14, 1 Ko 9:22, Je 5:20  
**4:16:** Aposel 20:28; Rom 11:14; 1 Korin 9:22; Jems 5:20

## 5

*Pol ghaze, Timoti gumazamiziba uan adarazir min me damu*

<sup>1</sup> Ni gumazir aruabar atar pamten me mikiman marki. Puvati, ni uan afeziamin min aghumra me mikimiva me fi. Egh gumazir igiaba, ni uan aveghbuabagh ami moghin, deragh me damu. <sup>2</sup> Egh amizir aruaba, ni uan amebam gami moghin, arazir kamra deragh me damu. Egh amizir igiaba, ni uan buaramizibagh ami moghin, deragh me damu. Kar arazir bar Godin damazimin zuezim.

*Tina amizir odiaribar ganam?*

<sup>3</sup> Eghti amizir odiaritam bar uabira ikitima, ni bar arazir aghuimin a damu. <sup>4</sup> Eghti amizir kam boriba ko igiaba ikiti, ni borir kabar akurvaghti, me deraghvira kamaghin fogh suam, men ingangarir faragh Godin damazimin damuamim a kara, me bar deraghvira uan amebamin ganam. Egh arazir kam, me uan amebam ko afeziamin akurvazim ko ingangarir dafar aning fomira me gamiziba ikarvaghham. God arazir kam bar a gifonge. <sup>5</sup> Ezi amizir odiarim bar uabira iti, ezi tav an garir puvati, a kamaghin ami, a nighnizir gavgavim Godin ikiava egha bizir aghuir a fogha iniamibav zua iti. Egha a zurara arueba ko dimagaribar God ko miagiava, uabin akurvaghasa an azangsis. <sup>6</sup> Ezi amizir odiarir uan mikarzim isa pura tintinimin bizir igharazibagh amim,

---

5:1: Wkp 19:32    5:1: Ofa Gami 19:32    5:4: Mt 15:4, Ef 6:1-2, 1 Ti 2:3    5:4: Matyu 15:4; Efesus 6:1-2; 1 Timoti 2:3    5:5: Lu 2:37, 18:1, 18:7, Ap 26:7, 1 Ko 7:32    5:5: Luk 2:37; 18:1; 18:7; Aposel 26:7; 1 Korin 7:32

an angamira ikiava, navir averiamin aven, a mati aremegha gifa. <sup>7</sup> Eghti ni akar gavgavir kam uaghan, gumazamiziba me daningti, me arazir aghuibar amuti, kamaghin gumazamizir igharaziba men gan akar kuraba me mikiman kogham. <sup>8</sup> Ni oragh. Tina uan anababar ganan kogh, egh uaghan uan adarazir ganan koghiva, a guizbangira uan nighnizir gavgavim ataki. An arazir kurar kam, a gumazamizir nighnizir gavgavim puvatiziba, men arazir kurabagh afira.

<sup>9</sup> Ni amizir odiaribar ziaba akinafarimin aven da osirisi, ni amizir kamaghin amiba men ziaba osir: Amizir 60plan azenibar tugha ghuavanadiba, ko poroghamir arazim abighizir puvatiziba.\* <sup>10</sup> Amizir kabanang, gumazamiziba bar me gifo, me ingangarir aghuibagh ami: me uan boriba deravira men garava, dagheba nguibamin itir gumazamizibagh aniga, Godin adarazir dagariba ruava, gumazamizir osimtiziba itibar akurvagha, uaghan ingangarir aghuir igharazibagh ami. Kamaghin amir amizibara,

---

**5:8:** Ais 58:7, Mt 18:17, Ga 6:10, Ta 1:16    **5:8:** Aisaia 58:7; Matyu 18:17; Galesia 6:10; Taitus 1:16    \* **5:9:** E fozir puvati, me tizim bagha amizir odiaribar ziaba akinafarimin aven da osiri. Fofozir gumazir maba ghaze, amizir odiarir maba akam akirigha ghaze, me Godin ingangarim damuva egh ua pabar ikian kogham. Ezi Kraisin adarazi ti amizir kabar ziaba osiri. Egha me amizir kaba daghebar men akurvasi.    **5:10:** Hi 13:2    **5:10:** Hibru 13:2

nî men ziaba osir.†

<sup>11</sup> Ezi amizir odiarir bar ghurizir puvatiziba, nî men ziaba akınafarir kamın da osiran marki. E fo, men naviba ua pabar ikisi dikavti men arazir kam, a men arazir Kraıs baghavıra itim gafiragham.

<sup>12</sup> Egh tuavir kamın me akar dikirizir me faragha amizim ateghıva, me fogham, Godın damazımın men arazim ikufi. <sup>13</sup> Egha arazir mam me uaghan a gami. Me amirizir arazim gamuava pura dipenibagh arui. Me amirvazir arazimra amir puvati, me gumazamiziba amir arazibar akaba baragha dagh ifongegha, aruava girakırangın me migei. Me uaghan akar e mikıman koghamıbav gei. <sup>14</sup> Ezi kî kamaghın nıghnısi, amizir odiarir igiaba ua pabar ikıva boriba batı egh uan paba ko boribar gan. Egh me kamaghın damuti, en apaniba men arazir me amıbar ganıva, akar kurabar e mikıman kogham. <sup>15</sup> Nî fo, amizir kabar maba me tuavir aghuim ategha, Satanın gın zui.

<sup>16</sup> Egh amizir nıghnızir gavgavım Kraısın ititam, an nguıbamın amizir odıariba uaghan ikiti, amizir kam uabi men gan. A kamaghın damuti, siosın gumazamiziba men ganamın osımtiziba puvatıgham. Egh siosın gumazamiziba, me amizir bar uarira itibar ganam.

---

† **5:10:** Nî Jon Osirizir Akar Aghuim 13:1-17ın gan. Dughıar kamın, men arazimra kara, gumazamiziba izi nın dipenımın otoghti, nî fogh, tuavımın mıneziba men dagaribagh amıma da mıze, eghti nî men dagariba ruegh. Arazir kam, kar ingangarir amizir kınıba ko ingangarir gumazir kınıbar ingangarımra. Ezi İesus uan suren gumazıbav gıa ghaze, ia uarı ingangarir gumazir kınıbar mın ikiam. Nî Matyu 20:25-28ın gan. **5:13:** 2 Te 3:11

**5:13:** 2 Tesalonıka 3:11

**5:14:** 1 Ko 7:9

**5:14:** 1 Korın 7:9

*E siosin gumazamizir dapanir ingangarir aghuim gamiba, e deravira men ganam*

17 Siosin gumazamizir dapanir ingangarir aghuim gamiba, ia ziar ekiam ko ivezir aghuim me daning. Bizir kaba faragh da iniamiba, kar gumazamizir dapaniba, me ingangarir dafam gamua Godin akam akura, egha God ifongezir arazibar gumazamizibar sure gami.

18 E fo, Godin Akinafarim kamaghin migei, “Ia, bulmakau raizin iniba tuir dughiamin, ia an akam ikeghiva damisi an anogoroghan marki.” Ezi e fo, “Ingangarir gumazim, a uan ivezim iniam.”

19 Eghti tav kamaghin mikim suam, siosin dapanitam arazir kuram gami, eghti ni akar kam baraghan marki. Eghti, gumazamizir pumuning, o pumuning ko mikezim, an ganigh bar moghira akar kamra mikimti, ni me baragh.

20 Eghti gumazamizir dapanitaba arazir kuram damighti, ni gumazamiziba bar men damazimin me akirigh. Eghti kamaghin igharaz darazi me uaghan atiatingam.

*Timoti deragh uan arazibar gan*

21 Ezi ki Godin damazim ko Krai Iesusin damazim ko Godin enselbar damazibar, ki bar

---

**5:17:** 1 Ko 16:18    **5:17:** 1 Korin 16:18    **5:18:** Lo 25:4, Mt 10:10, Lu 10:7, 1 Ko 9:9    **5:18:** Godin Araziba 25:4; Matyu 10:10; Luk 10:7; 1 Korin 9:9    **5:19:** Lo 17:6, 19:15, 2 Ko 13:1    **5:19:** Godin Araziba 17:6; 19:15; 2 Korin 13:1    **5:20:** Lo 13:11, Ga 2:11, 2:14, Ef 5:11, Ta 1:13    **5:20:** Godin Araziba 13:11; Galesia 2:11; 2:14; Efesus 5:11; Taitus 1:13    **5:21:** 1 Ti 6:13, 2 Ti 2:14, 4:1    **5:21:** 1 Timoti 6:13; 2 Timoti 2:14; 4:1

deragha kamaghin ni migei, ni bar deravira ingangarir ki ni mikemezir kabar amu. Egh ni ingangarim damuva, ni gumazir ekiaba ko namakabara me isi uabin toroghan marki. Ni arazir vamira gumazamiziba bar, me damu.

<sup>22</sup> Egh ni zuamira Godin ingangarim damusi gumazitaba amisivisi dafariba me gisin darighan marki. Eghti gumazamizir kabar arazir kuraba, dar osimtizim nin ikian kogham. Ni ua bagh ganiva, egh Godin damazimin bar zuegh ikiam.

<sup>23</sup> Ni pura dipar kinibar aman marki. Ni wainin dipar muziarir taba sara damiti, da nin navimin akuragham. Eghti arimariar zurara ni bativir kam, a givagham.

<sup>24</sup> Gumazamizir mabar arazir kuraba, bar azenara itima, me dar gara ghaze, men araziba bar ikufi. Ezi mati men arazir kurar kaba da faragha ghua kotin otifi. Ezi gumazamizir igharazibar arazir kuraba da mueghav iti. Egh gin da aghurighiram. <sup>25</sup> Ezi kamaghira arazir aghuiba uaghan azenan otivizi, me dar gari. Ezi arazir aghuir maba zuamira azenan otivir puvati, da uaghan mongegh mamaghira ikian kogham.

## 6

*Ingangarir gumazamizir kiniba arazir aghuibara damu*

<sup>1</sup> Gumazamizir igharazibar apengan itir ingangarir gumazamiziba, me bar uan gumazamizir

---

**5:22:** Ap 6:6, 13:3, 1 Ti 4:14, 2 Jo 11      **5:22:** Aposel 6:6; 13:3; 1 Timoti 4:14; 2 Jon 1:11      **6:1:** Ro 2:24, Ef 6:5, Kl 3:22, Ta 2:5, 2:8-9, 1 Pi 2:18      **6:1:** Rom 2:24; Efesus 6:5; Kolosi 3:22; Taitus 2:5; 2:8-9; 1 Pita 2:18

ekiar men gariba deragh me damuva, ziar ekiaba me daningiva men apengan iki. Eghti gumazamizir ekiar men gariba, Godin ziam ko en suren migirigiaba, akar kurabar dav kiman kogham. <sup>2</sup> Eghti ingangarir gumazitamın garir gumazir eki-atam a nighnizir gavgavim ikiti, an ingangarir gumazir kam kamaghın mikiman marki, a nan mav, kamaghın ki an akaba batogham. Puvati, a kamaghın nighnigh suam, gumazir kam ki an akurvaghsi ingangarim damuam, a nighnizir gav-gavim itima, ki bar a gifonge. Egh nighnizir kam a damuti, a ingangarir aghuim damuam. Timoti, ni gumazamiziba akar kaba me mikiniva men sure damu.

*Dagiabagh ifongezir arazim, an arazir kurar guar aviribar mingarim*

<sup>3</sup> Tav akar igharizitam ian sure damuva, kamaghın mikim suam, En Ekiam Kraıs İesusın guızın akam ko Godin gin zuir arazımın suren migirigiaba, da guızın akaba puvati, <sup>4</sup> gumazım o amizir kam uan nighnizibara ifuegha uabıra uabi fe, egha bizitam gifozir puvati. A nighnizir kuram ikia, ariava onganizi moghin, akabar gumazibagh afighasa, pura bizir muziariba bagha akabar uari adoghodosi. Akar kamaghın amiba, da gumazamizibagh amima men naviba gumazamizir igharaziba bagha men derazir puvati, egha uari abigha, gumazamizibar ziabagh asighasigha,

---

**6:2:** Kl 4:1, 1 Ti 4:11, Fm 16    **6:2:** Kolosi 4:1; 1 Timoti 4:11; Filemon 1:16    **6:3:** Ga 1:6-9, 2 Ti 1:13    **6:3:** Galesia 1:6-9; 2 Timoti 1:13    **6:4:** 1 Ko 8:2, 1 Ti 1:4, 1:7, 2 Ti 2:23, Ta 3:9    **6:4:** 1 Korin 8:2; 1 Timoti 1:4; 1:7; 2 Timoti 2:23; Taitus 3:9

nighnizir kurabar igharaz darazigh amua, <sup>5</sup> egha me zurara pura uarir atari. Ezi gumazamizir arazir kabagh amiba, men nighniziba derazir puvatizi me bar onganigha guizin akam gifozir puvati. Me ghaze, Godin gin zuir arazim, mati biziba isir tuavim.

<sup>6</sup> Guizbangira, e God e ganidir biziba bagh bar akueghiva, an arazibar gin mangiti, God bizir aghuir bar aviriba e daningam. <sup>7</sup> E fo, en amebaba e batezi e nguazir kamın otozir dughiamın, e bizitam suiragha izezir puvati. Egh dughiar e ovegh mangamim, e uaghan bizitamın suiragh mangan kogham. <sup>8</sup> Kamaghın amizi e dagheba ko iniba iki, suam, “Kabanang, en tughati.” <sup>9</sup> Ezi gumazamizir dagiaba iniasa bar ifongeziba, Satan me gifara men nighnizibagh etui, mati asizim azuazim gupuzi moghin, men naviba, arazir onganir avirir osimtiziba anidibar amusi dikavti, bizir kam bar me damu me gasighasighti me bar ikuvigham. <sup>10</sup> Ezi dagiabagh ifongezir arazim, an arazir kurar guar aviribar mingarim. Gumazamizir maba dagiaba baghavira ifonge, ezi arazir kam me gamima, me uan nighnizir gavgaviba

**6:5:** 1 Ko 11:16, 2 Ti 3:8, 4:4, Ta 1:11, 1:14, 2 Pi 2:3      **6:5:** 1 Korin 11:16; 2 Timoti 3:8; 4:4; Taitus 1:11; 1:14; 2 Pita 2:3

**6:6:** Sng 37:16, Snd 15:16, Fl 4:11-12, 1 Ti 4:8, Hi 13:5      **6:6:** Onger Akaba 37:16; Aghuzir Akaba 15:16; Filipai 4:11-12; 1 Timoti 4:8; Hibru 13:5

**6:7:** Jop 1:21, Sng 49:17, Snd 27:24, Sav 5:15      **6:7:** Jop 1:21; Onger Akaba 49:17; Aghuzir Akaba 27:24; Fofozir Gumazim 5:15

**6:8:** Snd 30:8, Hi 13:5      **6:8:** Aghuzir Akaba 30:8; Hibru 13:5

**6:9:** Snd 23:4, 28:22, Mt 13:22, 1 Ti 1:19, 3:7, Je 5:1      **6:9:** Aghuzir Akaba 23:4; 28:22; Matyu 13:22; 1 Timoti 1:19; 3:7; Jems 5:1

**6:10:** Kis 23:8, Lo 16:19, Ef 5:5      **6:10:** Ua Me Ini 23:8; Godin Araziba 16:19; Efesus 5:5

ataghırası. Egha me osımtızir kurar ekiam isa, mati afuzim navim okoregha vongın oto.

*Pol akar gavgavir aghuıbar Timoti miğei*

<sup>11</sup> Ezi no, ni Godın gumazimra, ni bizir kurar kaba akırım ragh dagh asaragh. Egh ni arazir aghuıbar amuva, guızın Godın Arazıba inıva, niğhnızir gavgavim ikıva, ıgharaz darazigh ifongezir arazim ikıva, arazir tughı gavgavıgha osımtızıba bar da ateramim ikıva, egh gumazıbar asughasughamin arazim iki. Ni arazir kaba bar pamtem dar suiragh dar gın mangı. <sup>12</sup>

Gumazir niğhnızir gavgavim Kraısın itim, a mati gumazir deragha misozımın mın, uan niğhnızir gavgavımın aven tughı gavgafı. Kamaghın amızı ki ni miğei, ni uan niğhnızir gavgavımın aven tughı gavgavıghıva, bar deragh misogh. Fomıra ni uan niğhnızir gavgavir Kraısın itimın gun gumazamizir avıribar damazımın miğeıma me ni baraki. Dughıar kamın God ikırımırir aghuir mamaghıra itim inıasa nın dia. Eghti ni deragh misoghıva, ikırımırir kamın suıgham. <sup>13</sup>

Godın bizıba bar dagh amızı da angamıra itim, ko Kraıs İesus, gumazir Pontius Pılatın damazımın deragha bıghavıra uabın gun mikemezim, ki aningın damazımın akar gavgavımın ni miğei.

<sup>14</sup> Akar gavgavir ni inızir kam, ni bar deravıram an gın mangı. Ni miğırıgıar kuratam, o

---

**6:11:** 2 Ti 2:22    **6:11:** 2 Timoti 2:22    **6:12:** 1 Ko 9:25-26, 1 Ti 1:18, 2 Ti 4:7    **6:12:** 1 Korın 9:25-26; 1 Timoti 1:18; 2 Timoti 4:7

**6:13:** Jo 5:21, 18:36-37, 19:11, 1 Ti 5:21, MAA 1:5    **6:13:** Jon 5:21; 18:36-37; 19:11; 1 Timoti 5:21; Akar Mogomem 1:5    **6:14:** Fl 1:6, 1:10, 1 Te 3:13, 5:23    **6:14:** Filipai 1:6; 1:10; 1 Tesalonika 3:13; 5:23

bitam damuan marki, ehti me akar kuratam ni mikiman kogham. Egh ni bar deragh akar kamigin mangiva, en Ekiam Krai Iesus ua izamin dughiamin tugham. <sup>15</sup> A dughiar God atizimin otogham. God uabira, gumaziba an ziam fe. Egha a uabira, biziba bar dar gari da an apengan iti. A guizbangira Atrivibar Atrivir Ekiam, ko Gumazamizir Ekiabar Gumazir Ekiam. <sup>16</sup> A uabira oveghan kogham. An angazangarir ekiamin aven iti, ezi e an boroghin mangighan kogham. Tav an ganizir puvati. Ehti gumazitam o amizitam an ganighan kogham. Kamaghin amizi, e zurara an ziam fam, egh mikim suam, an gavgavim ikivira ikiam. Bar guizbangira!

*Gumazamizir dagiar aviriba itiba, me nighnizir gavgavim Godin iki, egh gumazamizibar akurvagh*

<sup>17</sup> Gumazamizir dagiar aviriba ikia nguazir kamın itiba, ni kamaghin me mikim, me uari uan ziaba fan marki. Egh me uan bizir pura ikuviba nighnizir gavgavim dar ikian marki. Me guizbangira nighnizir gavgavim Godra iki. An e damuti, e bar akongeghasa, a bizir aghuir aviriba e ganidi. <sup>18</sup> Ni kamaghin me mikimam, me arazir aghuir aviribar amuva igharaz darazir

---

**6:15:** Lo 10:17, 1 Ti 1:11, 1:17, MAA 17:14, 19:16      **6:15:** Godin Araziba 10:17; 1 Timoti 1:11; 1:17; Akar Mogomem 17:14; 19:16

**6:16:** Kis 33:20, Jo 6:46, Fl 4:20, Ju 25      **6:16:** Ua Me Ini 33:20; Jon 6:46; Filipai 4:20; Jut 1:25      **6:17:** Sng 62:10, Mk 10:24, Lu 12:20-21,

1 Te 1:9      **6:17:** Onger Akaba 62:10; Mak 10:24; Luk 12:20-21;

1 Tesalonika 1:9      **6:18:** Ro 12:13, Ga 6:6, Ta 3:8, Hi 13:16, Je 2:5

**6:18:** Rom 12:13; Galesia 6:6; Taitus 3:8; Hibru 13:16; Jems 2:5

akurvagh. Egh me zurara bizir aviriba gumazamizir biziba puvatizibar aning. Egh me uan dagiabagh nighnigh suam, kar en bizimra puvati. Guizbangira, me bizir taba isiva igharaz darazir akurvagh. <sup>19</sup> Egh me kamaghin damuva, me mati gumazim gin uan dabirabim bagha bizir aviriba arisi. Egh me gin iniamin dabirabim uari bagh anerkir, egh ikirimirir guizbangira itim iniam.

*Pol migirigiar abuananaba Timoti ganidi*

<sup>20</sup> Timoti, ni bar deravira ingangarir God ni ganingizir kamin gan. Egh pura akar Godin nighnizimin gin zuir puvatiziba akirim ragh dagh asaragh. Egh ni gan fogh, gumazamizir kaba ifara ghaze, e Godin fofozim iti, egha men nighniziba ko Godin nighniziba uari adosi. Ni gumazamizir kaba bar men saghon iki. <sup>21</sup> Gumazamizir maba fofozir kamin gin ghua, egha nighnizir gavgavimın tuavim ataki.

Godin apangkuvim ni ko iki.

---

**6:19:** Mt 6:19-20    **6:19:** Matyu 6:19-20    **6:20:** 1 Ti 4:6-7, 2 Ti 1:14, 2:14, Ta 1:9, MAA 3:3    **6:20:** 1 Timoti 4:6-7; 2 Timoti 1:14; 2:14; Taitus 1:9; Akar Mogomem 3:3    **6:21:** 1 Ti 1:16, 1:19, 2 Ti 2:18    **6:21:** 1 Timoti 1:16; 1:19; 2 Timoti 2:18

**Godin Eghaghanim: Akar Gavgavir Dikirizir  
Ghurim ko Igiam**

**The Holy Bible in the Aruamu language of Madang  
Province, Papua New Guinea, 2020 Edition  
Buk Baibel long tokples Aruamu long Madang Provins  
long Niugini long 2020**

copyright © 2020 Pioneer Bible Translators

Language: Aruamu

Translation by: Pioneer Bible Translators

Contributor: The Seed Company

GOD'S STORY in the Aruamu Language of Papua New Guinea

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source files dated 29 Jan 2022

8f6beb37-6783-55d5-91ed-8321cc3f5eea